

四庫全書

史部

欽定四庫全書

史部

延祐四明志卷

十九

詳校官編修

臣

曹振鏞

檢討

臣

德生覆勘

總校官編修

臣

王燕緒

校對官中書

臣

陸湘

謄錄監生

臣

范從理

欽定四庫全書

延祐四明志卷十九

元 袁桷 撰

集古攷

郡以山川傳傳莫詳於前賢廣其傳則凡四方之公卿  
與夫騷人禪子之所紀刻益尊以傳焉裴公紀德碣屢  
燬益彰牧守宜視諸荒園故宅申之以感慨豐碑磨  
泐日尋於榛棘間見益遠桑海之喻詎不信諸作集古

攷

文

明州刺史河東裴公紀德碣銘

并序

皇唐御神器一百四十二載天下大康而海隅小寇敢肆蠱毒結亂于甌越而句章控吳越之口戰卒數萬皆由此之故是郡罹災逾苦井邑焚蕪遺骸積而不掩生民僅有存者教養未完其危猶未安天子哀之詔擇可  
以子物拯艱者以鎮卹之乃命長安令河東裴儼殿於

茲邦詔書既下而罷民歡煦若幼子之望慈父焉彤襜  
甫來則改令創瘼之境熙熙如衣之食之一年而驚逋  
復田疇闢茨壘興然後以禮義利物之教教之人之  
齒  
窳者教之以溫恭惇質人之卉服祝髮者教以儀飾之  
度人之匱財乏食者教以耕耨之事羣吏懷其仁而畏  
其嚴罔敢射其利焉故為政三年其賞人也不用財其  
勵人也不以罰於戲長人之體不一若乃華夏之人習  
性素純其理之也可期月而致若海裔之人土風俗素

暴殘嗜殺寬之則法令非行威之則園視而克心勃生  
其欲馴之也難矣哉及公之化風俗為鄒魯使父子長  
幼各得其宜則知中庸清靜之德感人深矣夫理一邑  
而能人和物阜者則可以移於一郡而能導之以德教  
者則可以施於天下公之所理之行豈止郡邑而已實  
宜佐彼大化輔皇王以昌經邦國以康調元氣於陰陽  
者也公尋而進秩州民共思願紀詞于碑予忝躡高蹤  
竊跡前事敢不頌厥美貽諸億祀銘曰美裴公兮肅肅

清風純和積中令德顯融爰踐華省爰宰赤城克成厥  
功帝曰咨爾休懿可建旗于東美裴公兮于郡斯牧是  
祇是肅化流比屋變此土風迄成魯俗人之父母匪公  
而誰慰我惓獨羨裴公兮胡棄我而適他邦惟我下民  
思心徘徊殷焉不忘願頌休績播億萬載刊于圭璋國  
子監丞充集賢院學士李陽冰書檢校左散騎常侍兼  
越州刺史賜紫金魚袋江東西節度副使王密撰

慈溪縣清清堂記

徐璋

余一日過是邑聞邑大夫黃公嚴明通漫刺謁之公倒  
屣迎門倍越平生好頃之延余一堂榜曰清清憑高原  
面廣野基宇聳壯丹青煥飾周旋熟視見平蕪散綠脩  
竹環翠孤村落照而飛烟有無遠水斷霞而白鳥上下  
余謂揭堂之名殆以目之所寓者歟公笑復之曰非也  
將水禽朝晰松籟悠颺艇棹絕湖而漁唱數聲牛羊下  
坡而牧笛孤響殆以耳之所聆者歟曰亦非也抑訟息  
庭虛退而孤坐琴橫淨几香裊蠻爐一慮不生萬緣俱



滌終日寓之而忘身之在仕堂之為公舍豈以意之所  
適者歟曰皆非也蓋淳化中有賢令張公叔達綽著彊  
明茂昭清德政施百里而聲達九重時太宗璽書敦獎  
先詔尚存後人惜其清名慮久湮沒無以勸後廼建堂  
揭榜曰清清俾游息是堂者睇仰前軌脫不能與其  
抗衡並馳抑終不失為自好者矣予自領邑見其柱礎  
傾敝棟梁蠹腐稍不葺完必將頽廢因念召伯之棠尚  
戒翦拜况棟宇乎遂鳩工掄材增卑廣狹整敝易蠹為

一新之不唯不墮前人之志抑將永君子之傳予聞其  
言懼然自愧逆料鄙淺因嗟先王道德之澤熄入而從  
仕者多失已於物以自投于苟賤不廉之地間能潔廉  
缺

書簾堂記

趙省

右朝奉郎宋侯子剛治鄞之三年政成民和上下安習  
凡所施設不待教令而民聽已孚訟稀事簡公庭肅然  
日以優暇乃即廳治之東為堂三楹以視事以延客以

休其餘日鳩工命材棟宇輪奐官不知費民不告勞經  
始於辛巳仲秋竣事於是年季冬落成之日因取顧愷  
之宰山陰之政榜曰畫簾噫侯之為是舉也非夸大以  
掠美誠得所謂名者實之賓歟夫民不難親也惟平易  
能近之民不難化也惟寬厚能服之平易貴清淨而不  
擾寬厚貴豈弟而不暴以是施於有政使之無訟也又  
何難哉今晏眠而擁黃紬卜晝而酣醇酎文書堆案漫  
不省顧以是為平易謂之食焉而怠事可也經費常賦

慢令失期獄訟簿書一視成檢以是為寬厚謂之縱吏以虐民可也苟如是則寄百里之任者心逸而體胖齒負版之列者悼屈而無告引利償害其自為謀則善矣獨不念學道愛人之語乎惟宋侯之理鄆則不然旦起據案訟牒山委勤勤致詰曲盡其情催科調斂示以期會下皆奔走而樂輸曾無追逮之煩宜其政平訟理庭無留滯方愷之之治如天冠地屨豈但彷彿其流風善政而已蓋山陰在當時戶不過三萬其縣用無事晝日

垂簾特折枝之易耳鄞自西漢距今號劇邑民夥訟繁  
十倍山陰宋侯方且慕仰之若是可謂廉於取名者矣  
于時國家有邊事州縣簡料兵壯備預儲峙以應上之  
求常苦不暇給而侯能多多益辦如王夷甫在元城時  
終日清談而縣務自理其材力過人遠甚若乃吏退身  
閒賓僚畢集彈綠綺以舒懷對紋楸而坐隱壺觴相命  
歡歌嬉娛此在它人常劫劫而侯之樂獨有餘亦足以  
見游及之所及矣異時第最天朝登名史氏號居循吏

之目當以鄴治為先宋侯名應子剛其字也視大丞相  
莒公為三世祖精於吏道飾以儒雅不圯先世之餘烈  
云紹興壬午閏二月既望

重建經綸閣記

徐度

或謂君子之仕為郡邑既去而能使人思之不忘在古  
或有後世則難而邑其尤也何哉古之為邑位均子男  
南面聽事生殺予奪悉繇以出而無有齟齬於其間故  
得以行其志後世為邑品秩卑而法令繁品秩卑則選

任輕法令繁則牽制衆以秩卑之吏而迫於繁令之拘  
其治效之難成固宜是或一理也而未之思夫君子惟  
無仕則已仕則未嘗擇官焉居是官也則必事其事就  
其力之所可為而為之上可以裨於公下可以及於民  
安有難易之時云乎惟怠者將以遂其媮則常以不得  
為自解誕者將以肆其夸則常有所不屑也胡不以聖  
人之事觀之乎昔孔子初仕為中都宰制為養生送死  
之節長幼異食強弱異任男女別塗路無拾遺器不雕

偽行之一年而四方之諸侯則焉孔子固覆生人之器也顧屈為一邑而諄諄於教化如此惟其無有不屑之心故歟且迹夫聖人之所為其稽之當今之法令皆明示勸獎而誘使為之者也故相國荆文王公慶厯中嘗以廷尉評事來為鄞令于時年甚小氣甚銳而學甚富其志意之所存遠矣叢爾一邑固區區者宜若無足以為而公初無不屑之心日夜惟以為民興利除害為事距今蓋一百九年矣而其所興造之蹟尚班班可攷遺



民子孫常相與傳誦其事指其蹟而懷思之是非真知學夫聖人之為安能及此宜邑人思之愈久而愈不忘也初公既沒當元祐中為令者嘗因一人之思即治所公昔燕休之地作為重屋肖公之象而祠之名曰經綸閣中遭兵火久廢弗復紹興二十有四年公之弟校理府君諱安國之曾孫右通直郎燧來莅茲邑自以獲踵其先世故治為榮規規焉推前人之心以施於治不敢少自怠弛居無幾何邑人安焉相與言曰文公之德邑

人所不敢忘也而公之諸孫復來治我就使無意於民  
猶當謹以事之況其賢稱其家哉惟是經綸之閣久廢  
未復其何以示吾子孫而慰吾賢大夫之思矧朝廷清  
明郡政安靜治新斯閣今也其時乃鳩工聚材而請于  
太守貳卿王公公方以儒術為治亦樂夫有助於教化  
也而許焉閱七十日而告訖功凡材甃甃坯葦竹之費  
土木工人之直一出於民之願輸而官無所預焉既而  
燈以書來告度曰閣之復也非我實使之民惟吾家相

國之不忘是不可以不有紀述也子於我有連其為我書其事度辭謝不敢當書再三返而請益勤曰吾石具已久待子之文以刻乃為叙邑人所以不忘者且誌歲月焉熒字子華謹飭好學能守其家法者也紹興二十五年二月旦日

東嶽行宮記

蔣安義

四明屬邑六獨昌國居重海大洲中視他邑最為僻遠部使者按視罕及其境傳檄往來趣期會簿書而已初

邑之未建隸籍于鄞度越既險民之利病休戚有不得  
告者焉熙寧間荆國王文公始請建邑逮今四十載矣  
更令佐以十數然流風善政不可悉舉頃則有延平陳  
公戩建安章公邦獻今大梁趙公君竑受命為宰而南  
康李公恕實為之佐下車以來諏詢民瘼弊者革之蠹  
者鋤之政適其平人用不爭年穀告豐邑遂大治邑之  
老聚族而謀曰我曹生長太平不見兵革幸值明天子  
惠我以賢令佐矜老而恤孤養病而葬死雖父母之恩

不厚於此我聞東嶽之神實祐我宋陰福吾人盍相與  
尸而祝之以祈吾令佐富壽康寧乎於是翕就應者如  
響父老占之少壯營之運土于原度材于山深殿覃覃  
脩廊陰陰其直如繩其平如砥其高如軒其張如翼堊  
以白盛飾以丹朶春秋歲時以祀以享若有神物來游  
其間宮始造於元符三年四月落成於大觀元年五月  
郡人蔣安義為之文曰瀕海之東龍濤匝空杯浮土封  
為明附庸兩山中分屹立嘉門雷吼電奔控潮于鄞壤

絕勢孤摧舟畏塗束手庭趨聽于大夫二公之來天錫  
雄材却除氛埃霧闢雲開政道其平安瀾不驚和氣充  
盈庶績以成斯民無憂聚族而謀以祈以求報之公休  
稽首嶽神體聖蹈仁手幹洪鈞下臨斯人廼咨羣工作  
為行宮父子祈公壽考來同席捲榛荆巖巖百楹塗以  
渥青周以層城春秋歲時祭祀禱祠旨酒純犧饋餞有  
儀匪亘匪觴明德之將神之來翔降福穰穰蒼山之巔  
石完而堅勒此文焉垂千萬年

阿育王山廣利寺宸奎閣記

蘇軾

皇祐中有詔廬山僧懷璉住京師十方淨因禪院召對  
化成殿問佛法大意奏對稱旨賜號大覺禪師是時北  
方之為佛者皆留於名相囿於因果以故士之聰明超  
逸者皆鄙其言詆為蠻夷下俚之說璉獨指其妙與孔  
老合者其言文而真其行峻而通故一時士大夫喜從  
之游遇休沐日璉未盥漱而戶外之屨滿矣仁宗皇帝  
以天縱之能不由師傳自然得道與璉答問親書頌詩

以賜之凡十有七篇至和中上書乞歸老山中上曰山  
即如如體也將安歸乎不許治平中再乞堅甚英宗皇  
帝留之不可賜詔許自便璉既渡江少留于金山西湖  
遂歸老于四明之阿育王山廣利寺四明之人相與出  
力建大閣藏所賜頌詩榜之曰宸奎時京師始建寶文  
閣詔取其副本藏焉且命歲度僧一人璉歸山二十有  
三年年八十有三臣出守杭州其徒使來告曰宸奎閣  
未有記君逮事昭陵而與吾師游最舊其可以辭臣謹



按古之人君號知佛者必曰漢明梁武其徒蓋常以藉口而繪其像于壁者漢明以察為明而梁武以弱為仁皆緣名失實去佛甚遠恭惟仁宗皇帝在位四十二年未嘗廣度僧尼崇侈寺廟干戈斧質未嘗有所私貸而升遐之日天下歸仁焉此所謂得佛心法者古今一人而已璉雖以出世法度人而持律嚴甚上嘗賜以龍腦鉢孟璉對使者焚之曰吾法以壞色衣以瓦鐵食此鉢非法使者歸奏上嘉歎久之銘曰

巍巍仁皇體合自然神曜得道非有師傳維道人璉道  
遙自在禪律並行不相留礙於穆頌詩我既其文惟佛  
與佛迺識其真咨爾東南山君海王時節來朝以謹其  
藏

鄞縣經游記

王安石

慶曆七年十一月丁丑余自縣出屬民使浚渠至萬靈  
鄉之老界宿慈福院戊寅升雞山觀硤工鑿石遂入育  
王山宿廣利寺雨不克東辛巳下靈巖浮石湫之壑以

望海而謀作斗門于海濱宿靈巖之旌教院癸未至蘆  
江臨決渠之口轉以入于瑞巖之開善院遂宿甲申遊  
天童山宿景德寺質明與其長老瑞新上石望玲瓏巖  
須猿吟者久之而還食寺之西堂遂行至東吳具舟以  
西質明泊舟堰下食大梅山之保福寺莊過五峯行十  
里許復具舟以西至小溪以夜中質明觀新渠及洪水  
灣還食普寧院日下是如林村夜未中至資壽院質明  
戒桃源清道二鄉之民以其事凡東西十有四鄉鄉之

民畢已受事余遂歸去

新刻漏銘

王安石

戊子王公始治于明丁亥孟冬刻漏具成追謂屬人嗟  
汝予銘自古在昔挈壺有職匪器則弊人亡政息其政  
謂何弗棘弗遲君子小人興息維時東方未明自公召  
之彼寧不勤得罪于時厥荒懈廢乃政之疵嗚呼有州  
謹哉維茲茲惟其中俾我後思

基法師真贊

楊億

巍巍哲士出生象季演教台巖領徒鄞水安養靜因假  
中了義花雨談空薪灰滅智雷潮聞寂丹采章施卓爾  
其相儼然正思牛檀匪歇犀柄如揮師承有衆瞻諦焉  
依

奉國軍節度使彭城錢公碑銘

崔仁冀

嗚呼魯誅宣尼謂旻天不弔齊銘文獻謂半嶽摧峯彼  
惟歎哲此乃傷宗終始禮全儻有貴乎啓足短脩分定  
亦奚甚乎戚容我國家系自仙靈基於神武岐周孫子

瓜瓞綿綿而逾長魯衛兄弟棣華韡韡以方盛其分宗之大創業之高班布前書煥列今史可得而畧焉公即武肅王之孫文穆王之第十子今大元帥吳越國王之  
大弟也諱億字延世錢塘人也天垂象而列為公輔嶽  
炳靈而誕作英髦神清而水鑑旁輝表異而山庭上聳  
未當就傳之歲已有能文之性採蠟珠而為鳳智與識  
偕洩雞白以成碑辭兼理勝生七歲而後異志千里以  
自然驪珠擅愛於掌中鳳綵推恩於膝下未出閤歲制

授尚書禮部郎中尋改直中都都指揮使檢校司徒開  
國伯食邑七百戶罷南宮之錦帳講上將之玉鈐鴻羽  
漸昇犀渠是肅辛丑歲文穆王升遐八極中獻王纘服  
二邦繼體守文乍洽輿人之望自家刑國先推睦族之  
恩天福八年六月授公起復雲麾將軍檢校太子太保  
尋歷太傅太尉尚書右僕射開國侯加食邑至一千五  
百戶端右纔儀於庭鷺具瞻旋逼於臺鸞儀自五宗言  
同三品丁未歲我上應楚庭之當拜副代邸之奉迎乾

坤定位於太初雷雨覃恩於洪覆指棲雞之堞將正階  
司顧審像之求不遐天序堯俞所屬康誥屢行公於是  
大空土之資真濟川之秩監董狐之史筆總天祿之殿  
書宗相燮和而惟允霸君垂拱以仰成未幾上以鎔山  
煮海之權富國強兵之本式資心計以瞻軍須乾祐元  
年四月委公判兩浙監鐵仍封新定郡公加食邑五百  
戶夜思經濟豈惟師孔僅前脩歲入羨盈不假辟李華  
旁贊四明提封千里雲屋萬家貢分於齒革羽毛俗殷



於魚鹽蜃蛤南琛交貿有蠻舶以時來東道送迎有皇  
華而歲至慎選茲任非親勿君明年五月授公判四明  
諸軍事易利建侯詩優布政攬轡有蘇舒之志下車多  
惠愛之方南畝嗇夫荷決渠降雨之利東野編戶安熬  
波出素之業郡歌來暮朝議陟明屬我上守位以仁因  
心則友念犬牙之相制式賴親親當龍首之高居常迴  
睠睠奉綸言而獎授擇寶器以頒宣駱驛道途蟬聯歲  
序其間擁旄入覲執玉在庭每將梁孝同居親為東平

行郎恩光不二禮分特高故得大國進封遙裂翦鶉之壤羣官處長兼同浴鳳之儀顯德初丁周國明懿善慶太夫人憂尋從泣血之中仰奉奪情之典洎大宋皇帝起陸龕難應天革命以我上秉三世之大節北面尊周率萬國之諸侯同心戴舜霸業騰高於踐土寵章廕及於在原建隆元年敕命公為奉國軍節度使自膺帝命彌勵政經內和民人外固封守福星坐照周旋六考之間甘雨行隨康濟一方之內必謂受祿未艾介福猶登

無何方寸之間忽遘在育之疾台星中折晉司空早自知亡喪氣東行荆太守俄鍾此釁以乾德五年春二月丁卯薨于府城之正寢享壽凡二百二十六甲子哀聞達聽痛軫上心七日罷朝百官奉慰博議易名之典廣求監護之才制贈官謚曰康憲以其年四月庚申葬于本軍奉化縣禽孝鄉白石里之原禮也守龜吉日踣馬開塋哀引長驅指蒿塹而去去風悲四起咽笳吹以淒淒北邙永閔於幽扃南氏空書於遺績公星潢演派虹

玉滋苗出藩入輔之才諒由天賦緯武經文之業且見  
日新其政理也簡靜爲先緩猛相濟愛如冬日穆若清  
風班鉄尺於旗亭市無二價設鋸筦於閭里路不拾遺  
其課績也輿賦均登逋民緝負疏鵠陂而資溉注創鰲  
榭以勝追遊設險守邦大峻金墉之制樹碑紀績親刊  
黃絹之辭其文學也洞究百家冥搜萬象蚪蚪書出于  
魯壁芙蓉詩生在謝塘玉如意之揮時紛紛兼講銅鉢  
聲之敲處續續成章其伎藝也授劔術於猿公傳弓聲

於鴈將章呈擅敏草聖推工顧誤曲於坐隅五音潛別  
覆殘碁於碑背一路無遺其風度也玉海千尋黃陂萬  
頃折旋中矩終讌不疲菊映漉巾陶亮乃羲皇上客雪  
沾鶴氅王恭真神仙中人其理性也得古佛之指歸經  
祖師之印可鍊寶結生天之果布金追陟岵之恩啟迪  
言筌豈止作山陰都講發揮心要固將同方丈上人總  
是全才誕為英器而乃際吾主隆平之運極周親友愛  
之恩入專和嶠之車出仗辛毗之節况復有厚於國有

慶於家康樂鳳毛悉聯榮於仕路太冲紈素俱結偶於  
相門委大化以如歸考終命而不亂斯盡善矣復何歎  
哉紀是殊政宜乎大手仁冀綵筆慙名銀臺辱召奉綸  
言而比事抽軋思以僅成刻在琅玕遠愧乎披文相質  
寘諸寘寘聊防乎深谷為陵謹為銘曰

東南福地表裏仙岡牒稱著姓識述興王極天基大積  
石流長秦中鹿走浙右龍驤武祖勃興文考光啟國霸  
魯史家肥戴禮乃子乃孫宜兄宜弟磐石分封平臺立

邱國之貴介才自天生蟾供硯滴霞翦詩情爰居西邸  
是則東平為霖入用同氣分榮地曰句章州名海岱乃  
輟牢盆言驅大旆六考之間百城之內民詠安堵史書  
課最覆君敦愛裂地酬勲天王輦寵奉國名軍圭桐舊  
翦符玉新分如楮天柱如捧日雲誓著山河任兼將相  
水薤政聲金滕德望適賴永藩忽悲中喪星澹三階位  
虛五帳鄮山之下鄞水之濱今茲著兆擇得蒿隣風旌  
飄瞥露挽酸辛為陵有日大夜無晨生理四明民享餘

利歿寔四明神資吉地有邵棠兮興歌有羊碑兮墮淚  
公之德兮公之功百世可知於錫諡

戊辰遊山題壁記

舒亶

元祐戊辰閏十一月己巳自西湖懶堂率臨海趙逢當  
時出江東宿延福庚午過東山永安己巳歲癸酉入大  
梅護聖觀常師舍利錫杖鉄鞭象齒丙子上保福己卯  
抵金峨真相謁中禪師辛巳鄞江張宏公度吳升潛道  
至自郡留一夕往象山壬午遊金文還宿西堂甲申同



中師離瑞相令偕師下東山迤邐以歸蓋在山間十有五日得僧院者六獨辛巳晴和登山為鬪草之劇餘輒雨雪所謂梅子真鍊丹井法華泉石柱山雲外庵皆欲往不果而公度約余道奉川境上遊安岳雪竇諸山且復不至亦遺恨也

四明陳及之曰誦金剛經於如如堂多年矣忽於誦經之所有芝草之祥作伽陀以贊之

陳瓘

念念然燈佛發此無根草堂上默觀之髮白何曾老

多福院記 袁穀

予自昭武歸故鄉視其閭巷非故也昔之榛棘者皆連  
費而駢棟矣昔之雕峻者皆蕭然而不屋矣見其父老  
非故也昔之孩提者皆頽然而長矣昔之少壯者皆皤  
然而老矣且死者十有八九矣訪其居民非故也昔之  
農者今轉而為工昔之商者今流而為隸貧者富而賤  
者貴皆交相為盛衰矣嗚呼世態之變如此所不變者  
巍然而高者吾知其為刹矣儼然而尊者吾知其為佛

矣鍾于朝鼓于暮環然而食者吾知其為僧矣歲雖水旱天不能以饑宅雖不毛地不能以寒勢雖王公人不能以賤求之於迹盛多而衰少推之於心背寡而向衆信乎非有常者孰能如此甬東有多福院者乾德三年州民趙軒舍園作室主者德全以施無礙之浴開寶七年州刺史錢億易號興福治平元年始錫今號焉熙寧元年有圓瑩者興其所廢而人樂輸其財新其所故而工樂竭其力未信者信人樂從其化未悟者悟衆樂入

其室元豐七年春二月燕然坐終繼者清雅亦其人也  
夫萬事之理勤於未就而怠於已成佚於有餘而勞於  
不足師能勤其所怠而勞其所佚則繼師者雖百世吾  
知其如今日矣元祐二年二月望記

奉化縣忠節四公祠堂記

家鉉翁

國於天地必有與立其惟忠義不二心之臣乎劉淵窺  
晉人知王道之反正不知開於戰死之路迷祿山沸唐  
人知子儀之撥亂不知基於仗節之杲卿伐我亡也鄙

我亦亡也不能使無伐而能使無鄙國其庶幾不能使  
無伐又不能使無鄙猶謂國有人乎肆惟寧皇之末年  
李全歸自山東而舉措非循服者越厥我理宗在御連  
率一旦束溼之全異心滋不可遏時則有若曹公孝先  
糾郡山陽建明屯田欲挈之以東征俾無居城中其慮  
深矣未報會全無厭之求弗慊僞如海州之命劉慶福脅  
犯閫帥曹公聞變亟自僉舍趨庭撫諭謂之曰有情欲  
陳當入文狀制置朝廷之制置犯制置是犯朝廷汝不

欲使李氏保其富貴哉其首命部曲弗敢言許制使國  
得泛舟于楚臺以避旣而謹動射公中咽公拔箭叱曰  
誤李全新東市非汝而誰曹孝先決不求生許制使決  
不可殺鏑鏃交集血流被體猶登子城求許公謀焉血  
盡氣微許公枕公以磚而絕手蔽吭而不可拆目怒瞠  
然許公回舟中慷慨曰國無以事朝廷報曹君矣亦死  
之公既不得斂亂軍取葦燎於城曲全歸自海反哭而  
弔且斬麾下謝公事定家人求骸弗可識漫號死灰覩

縷烟冉冉繞諸孤發之褐衲方尺儼不燬蓋公內手成  
者遂得裹馳事聞朝廷醕公甚厚當是時全特未反越  
明年冬全叛去保楚城於兩期生楚人於再歲非公其  
為誰全既猖獗嘯游淮瀆揚州之戰丁勝遣統制吳公  
從龍先鋒而不出師是置之死地也豈其挺身赴賊馬  
仆被執夷猶揚泰之道從容甲乙之辰易旗幟改號令  
陽許諾為開關洎駕海陵城下則呼曰我右軍統制吳  
從龍馬中矢執至于此揚州亡恙泰城堅宜死守賊無

能為也全寸嚮之而吳公詈不絕口嗚呼烈哉其功豈  
直蔽遮一城而已曾不兩月全首獻闕下初賊得吳喜  
甚謂泰在目一中一死盡折其銳魄褫氣奪不敗何待朝  
廷知公賜廟于揚于泰由今觀之曹公死於前全兩年  
而不反吳公死於後全五旬而遂亡謂非忠義之功可  
乎中間楚陷二三達官職曹府史多不免監州郭公德  
暢一家殲焉逆李為妖泰有三仁可不大書特書也哉  
異時汪寇煽衢又得一人曰西安尉舒公瀛目厭橫道



唱義鼓行竟與江山開化同寅捐驅綠林功雖未昌亦  
萬人吾往者朝廷既各旌之祠以對敬明詔長吏之責  
固爾未容以為多也余老矣岸幘山中聞邊遽輒思死  
士忽鄞友曹夢合走一介書以制使文昌本齋陳公從  
攝令常朝宗之請建祠學官求余記余持憲節浙東時  
嘗聞其語未暇求其人也朝宗吾甥也忠毅之孫頗有  
志攝事幾何時不避貪天誚當因公之教邦人之意如  
此邑有忠信尚告于未知者咸淳十年十一月朝奉大

夫直寶謨閣家鉉翁記通奉大夫寶謨閣待制提舉江  
州太平興國宮奉化郡食邑

缺

戶高衡孫書寶謨直

學士中奉大夫知慶元軍府事兼管內勸農使沿海制

置使龍泉縣開國男食邑

缺

戶陳存篆蓋

昌國縣大夫劉君生祠記

王應鳳

上臨御之二十三載妙簡銅墨以字民訓風示寓縣劉  
君謙孫繇元祐故家宰明之昌國於是適再期矣廉平  
簡靖民便安之越明年政成邑士累君之化相與言曰

令君幸惠吾邑勤亦至矣今將造朝微以寓攀截借留  
之意維昔庚桑治畏壘社而祝之厥有舊比廼肖像于  
學而祠焉踵余門請識其事余謝之曰劉君余伯氏之  
同寮也子諒肫實裏襮一如溫乎柔木之絲澹乎衣錦  
之絢豈與世健令求赫赫名者班乎而奚以象為且邑  
有生祠非古也昉於漢之于公厥後韋廣都義杜池陽  
軫陸浚儀雲史不絕書然繩之以召棠勿翦之義猶曰  
變之正者夫令去民最近是邑雖海陬去天為尤近近

天則聲聞易徹近民則恩信難孚毋怪乎推謝摩肩而誦僑絕響也劉君何以得此於邑人哉問之庠塾之士則曰言政不及化吏皆然令為甚君甫下車垂意誨育縮費廩士以歲之正飲酒于序燕毛以齒禮遜興焉學宮水環如帶鄉老以為文字之祥廼疏廼滌玦縈鏡澄而又捐奉入以養之涖校比以勸之是歲賓興有鴈行聯壁而監學亦多中鵠擢第者有人興廢葺圯去之日如始至復築室以奉先聖舊像扁以燕居膏火之中教

雨決焉弓張之急弦歌奏焉斯乃蒲密之所以垂芳也  
子以為何如余曰一鄉善士令君教養之所及也必如  
子羽之未嘗至偃室然後其言情而信姑徐之為我問  
政於鴈渚荒寂之濱既閱月有聽輿誦而復於余者曰  
維茲驚行舊多叨憤自君之來民不識吏庭少諍辭維  
茲萌黎近監之貧訖君之去海無怪風人厭魚蟹余聞  
之舍然曰士之言華民之言質是足以俎豆前脩矣于  
韋杜陸不專美於漢晉矣維先忠肅公以冀之南宮縣

譜推而為滑臺郡譜又推而為元祐相譜文獻所漸裳  
華是似清惠維祖朔齊維兄其政不棘於期會而以善  
俗為先厥有本哉君家自朔而蜀又自蜀而吳余常稱  
其為宰蓋所謂安靜吏恂懾無華者故不敢相蒙而溢  
美云寶祐五禩龍集丁巳閏四月既望儀真郡文學掾  
王應鳳記并書

延祐四明志卷十九

欽定四庫全書

延祐四明志卷二十

元 袁桷 撰

集古攷

詩

歸四明詩 胡幽貞

海色連四明扁舟去容易天籍豈輒問不是卑朝士

憶四明山泉 施肩吾

集賢堂詩  
卷二十  
愛彼山中石泉水幽聲夜落虛窓裏至今憶得卧雲時  
猶自涓涓在人耳

寄四明山子

高樓只在千峯裏塵世望君那得知長憶去年風雨夜  
向君窓下聽猿時

同諸隱者夜登四明山

半夜尋幽上四明手攀松桂觸雲行相呼已到無人境  
何處玉簫吹一聲



宿四明山

梨洲老人命余宿杳然高頂浮雲平下視不知幾千仞  
欲曉不曉天雞聲

游太平山

孔稚珪

石險天貌分林交日容闕陰澗落春榮寒巖留夏雪

戲贈育王虛白老

王安石

白雲山頂病禪師昔日公卿各贈詩行盡四方年八十  
却歸荒寺有誰知

觀明州圖

明州城郭畫中傳尚記西亭一艤船投老心情非復昔  
當時山水故依然

游天童溪上

溪水清連樹老蒼行穿溪樹踏春陽溪深樹密無人處  
惟有幽花度水香

鄞縣西亭

收功無路去無田竊食窮城度兩年更作世間兒女態

亂栽花竹養風烟

寄育王大覺禪師

山木悲鳴水怒流  
百蟲專夜思高秋  
道人方丈應無夢  
想復長吟擬慧休

別鄞女

年登三十已衰翁  
滿眼離傷祗自攻  
今夜扁舟來訣汝  
死生從此各西東

題寶岩寺寒碧亭

兩岸青山刻峭成一溪回曲篆紋平綠陰隱隱無重數  
欲去黃鸝又一聲

又

風吹洞口雲水動山頭月野老時問人前村多少雪

送竇公持鄞江尉

范仲淹

片帆飛去若輕鴻一霎春潮過浙東王謝江山久蕭索  
子真今為起清風

送丁司理赴明州

仙家枝葉令威孫南去司刑庇越民金闕道書微旨  
在獄多陰德是真人

道書謂升真者  
皆須曾為獄官

送湛公歸四明講席

滿面南風指四明山長水曲不勝情自言此去雲林下  
惟講華嚴報太平

遊翠巖山

舒亶

桃源深處一招提門對寒雲路遶溪長使千峯光景動  
未應洞裏老金雞

遊大梅護聖

萬壑聲中栢子烟  
高僧日日看雲眠  
當年象虎今何在  
千古寒堂一鐵鞭

仙去人間地轉靈  
蛟龍合處谷風生  
誰知雲霧千峯頂  
長作青天霹靂聲

流水山間無盡時  
登臨到處與心期  
世人只愛桃源好  
梅熟山間怎得知

雞犬同時亦上昇  
赤霄今日幾人行  
我來正唱昇平曲

不用山間變姓名

游灌頂三首

十里曾聞一嘯聲當年猿鶴想猶驚  
白雲不礙青天路贏得重來擺手行

萬松偃蹇插雲根四面諸峯盡子孫  
日日飛煙雲霧斂不妨掌上看乾坤

雪頂神僧眼覩天只應風月是生緣  
那知坐作人間雨千丈巖頭一道泉

歸郡書金峨二首

叱咤滄溟雪浪空  
鯨鯢騎去杳無蹤  
鍊丹井畔春蕭索  
知在蓬萊第幾重

又入西湖醉過春  
嶺頭猿鶴幾時聞  
無端雨意催人去  
直恐衣巾盡是雲

含珠林

萬箇松杉一顆珠  
老僧心手最工夫  
冷光長在千峯頂  
誰道人間夜月孤



題天王院內鑑堂

等是人間出世人數他珍寶信非真茫茫白日誰回首  
此處元無一點塵

福勝院

蒼巖赤壁聳崎嶇長者何年為布金却憶樵風生乳竇  
萬松回合兩龍吟

湖心寺偶書

吹落清香縹緲風樓臺鬢水邊紅人間誰是丹青手

畫取春湖細雨中

題竇林院瓊閣黎房

山農未用踏溝車一穴靈泉蔭萬家  
香積從今飽檀施  
會看講夜落天花

題法喜院是院一瓦一木皆自能師手而師丈  
室唯布衾木枕無復長物即之坐龐眉皓頂  
泊然似不能言者無乃真有道者耶

抱山重屋兩迴廊杉檜如雲百尺長  
香火他年誰第一

老師辛苦頂如霜

了無情解作攀緣一鉢三衣只兀然坐對青山不知老  
學人休問祖師禪

太白峯

千峯下視盡兒孫仙事寥寥不可聞長作人間三月雨  
請看膚寸嶺頭雲

太白庵

何年杖錫此徘徊天上真官為我來芝圃鶴歸香火冷

石臺空鎖舊莓苔

玲瓏岩

詭形迴與萬山殊  
空洞由來一物無  
直恐虛心自天意  
人間穿鑿枉工夫

響石

淵明休弄沒絃琴  
混沌中含太古音  
聞說幾回風雨夜  
四山彈作老龍吟

龍池

虛蹤聊寄數峯雲  
雨意含雲白晝昏  
不用高僧時呪鉢  
一泓長貯萬家村

虎跑泉

一嘯風從空谷生  
直教平地作滄溟  
靈山不與江心比  
誰會茶仙補水經

佛迹

蒼崖絕壁印苔痕  
陳跡千年尚似新  
杖屨紛紛走南北  
幾人不是刻舟人

臨雲閣

高僧終日笑憑欄亦似無心懶  
出山幾度海風吹雨散  
坐看綵翠落人間

春樂軒

隔水岩花紅淺深  
花邊相對語幽禽  
管絃不到山間耳  
誰會憑欄此日心

題宿鷺亭

雲過千溪月上時  
雪蘆霜葦冷相依  
正緣野性如僧癖

肯為游魚下釣磯

次韻昌國文饒

陳瓘

百川衮衮到來休  
此是人間第一流  
鯨鬣為君駭翻浪  
蘭苔空自滿汀洲

海邦渺渺知何在  
風入高帆頃刻過  
何似一尊湖上酒  
月明安穩照寒波

文饒自京師還欲往昌國而風作不可渡絕句

戲之

欲衝高浪却沉吟酒近瀛洲懶得斟  
莫道顛風無好意  
為君吹過遠歸心

對酒憶賀監

并序

李白

太子賓客公於長安紫極宮一見余呼余為  
謫仙人因解金龜換酒為樂歿後對酒悵然  
有懷而作是詩

四明有狂客風流賀季真  
長安一相見呼我謫仙人  
昔好杯中物翻為松下塵  
金魚換酒處却憶淚沾巾



狂客歸四明山陰道士迎勅賜鏡湖水為君臺沼榮人  
亡餘故宅空有荷花生念此杳如夢淒然傷我情

衆樂亭

王安石

使君幕府開東部名高海曲人知慕艤船談笑政績成  
洗滌山川作佳趣平泉浩浩銀河注想見明星弄機杼  
載沙築成天上路投虹為橋取孤嶼掃除荊棘水中央  
碧瓦朱甍隨指顧春風滿城金板舫來看置酒新亭上  
百女吹笙綵鳳悲一夫伐鼓靈鼉壯安期羨門相與遊

方丈蓬萊不更求，酒酣忽跨鯨魚去。  
陳迹空令此地留。

悼四明杜醇

杜生四五十，孝友稱鄉里。  
隱約不外求，耕桑有妻子。  
藜杖牧雞豚，筠筒釣魴鯉。  
歲時沽酒歸，亦不乏甘旨。  
天涯一杯飯，夙昔相逢喜。  
談辭足詩書，篇詠又清泚。  
都城問越客，安否常在耳。  
日月未渠央，如何棄予死。  
古風久凋零，好學少為已。  
悲哉四明山，此士今已矣。

憶鄞縣東吳太白山水

孤城回首距幾何憶得好處長經過最思東山春樹靄  
更憶東湖水波三年飄忽如夢寐萬事感激徒悲歌  
應須飲酒不復道今夜江頭明月多

書會別亭

西城路居人送客西歸處年年借問去何時今日扁舟  
從此去春風吹花落高枝飛來飛去不自知路上行人  
亦如此應有重來此處時

寄育王山長老常坦

道人少賈海上游海舶破散身波浮抱金滿篋人所寄  
吹簫偶得還中州羸身歸來不受報祇取斗酒相獻酬  
歡娛慈母終一世脫棄妻子藏崑幽蒼烟寥寥池水漫  
白玉菡萏吹高秋夜燃栢子煮山藥憶此東望無時休  
塞垣春枯積雪留沙礫感怒黃雲愁五更尺馬隨鴈起  
想見郊郭花木稠百年誇奪終一丘世間滿眼真悠悠  
寄聲萬里心綢繆莫道異趣無相求

送豐稷

曾子固

桃花染破南山青漢江此時春水生客舟相語人夜起  
勁橈亂江羣鴈聲知君飄泊動歸思告我舉裝千里行  
閤材壯思風雨發綠鬢少年冰雪清讀書一見若經誦  
下筆千言能立成精微自得有天質操行秀出存鄉評  
嗟徒薄祿困流滯能誘鄙俗銷紛爭絃歌躬勸士強學  
田里堵安人力耕嗟予據按但畫諾遇事縮手方蒙成  
雖知璞玉難強獻欲挂塵榻空含情歲寒不變迺知確  
物理先否終當亨維舟且盡今日語明日帆隨白鳥輕

和馬粹老脩廣德湖舒宣

古作重慮始功利故能永末俗分錐刀往往附光影此  
幾百歲餘興廢屢動靜七鄉十萬家利害寄俄頃譟張  
好惡曹聒亂劇池黽使君武陵孫明潔水中苻坐嘯黃  
堂春獨得意外景登臨莽蕪沒歎息民不幸一日山水  
光蕩漾出荒梗黍禾雜菰魚狼籍被他境人指白鶴祠  
慇懃竊有請衣冠儼郡公一一畫真鯁斯人豈可作庶  
用薦遺秉公乎且勿去何以慰鄉井願屬丹青手千載

共觀省

題它山善政侯兼簡鄞令

嗚呼王封君心事鬼出沒驅山截長江化作雲水窟旱  
火六月天萬棟掛龍骨蕭條一祠宇像設何髣髴破屋  
夜見星漏雨濕衫笏杯酒謝車籌茲事恐亦忽我聞古  
先王報施必稱物矧今崇佛宮民力殆欲屈豈無制作  
手一為起荒第李侯仁賢資撫字良砭砭可但清似冰  
方看健如鶻沉跡千載後行且見披拂陰功世易忘遠

慮俗多咈勉哉君毋遲斯民久已鬱

題放生池

南州幾萬家舟楫江湖上  
冒羅竭魚鼈旁饜口腹養可  
憐長者子於此事脫放藻荇被清流  
春風不驚浪直鉤  
亦何心明珠豈所望落日倚朱欄  
無言獨惆悵

題水月橋

長空瑩如磨平湖淨無滓  
萬里夜寥寥清光墮寒水松  
風吹更圓沙鳥睡不起徒勞  
野猿捕漫作玄珠比相對



倚朱欄時有逍遙子

遊翠岩六首

繆悠此投閒邂逅如得請終日對林僧是樂非世境千  
秋紙上塵萬事空中影既往悔可追無能味何永仍幸  
甘露音時時灌吾頂

翠岩老禪和欲退未容請聊許隱堂人先占廣軒境高  
松有寒青孤雲無定影草煖幽澗香鳥啼清晝永一笑  
碧雲旁未羨匡廬頂

聊謝都城遊來赴道人請冥懷麋鹿羣回首冠蓋境淥  
瀉泉石聲蕭森松檜影風帽何妨頽藜徑敢辭永還聞  
鐘磬音為我下雲頂

先生盍言歸小子願有請由來陶淵明結廬在人境閒  
抱無絃琴靜弄南窓影勝事幾人知高風千載永何當  
理籃輿步月下孤頂

願聞海潮音幾煩檀越請有物還有機無心即無境何  
當雪衲身重現水月影高卧與世疎孤坐共夜永時時

挂西牕溪光照霜頂

欣聞厭冥煩頗亦謝造請孤騫出塵埃勝踐得真境萬  
籟發靜音千巖度空影無味道終憐有役慮真永會當  
立節茨望子蒼岑頂

再遊天童山回吳與權諸友夜集

太白嶺岩幾百尺仙人一去無消息臨雲時復倚欄干  
獨看千峯萬峯碧昨夜長鬚城裏回報道湖上秋風來  
醉園雨過月臺冷籬根白菊看看開却杖青藜趁流水

目送征鴻下山背蓬船  
荅浪遶叢蘆咫尺烟汀幾萬里  
忽見江頭江月白紛紛笑語城東陌  
一尊此酒一枰碁  
未到懶堂猶是客

遊承天望廣德湖

桃源二月春風起是處穠華有桃李  
調笑聞聲不見人  
遊人只在華山裏華山逋客來何遲  
隱隱茶林隔煙水  
滿眼相思寄碧雲獨立城南望山背

送韋太守

四明山水東南表海鰲背上三仙島麗譙高逼斗牛寒  
一曲梅花萬家曉太守文章建安骨爽氣冷侵寒月窟  
黃堂水洗火符空明光却擁荷囊笏有客醉園雙鬢老  
宦情文思如秋草紫雲夢斷玉龍飛年年送客西城道  
曾是野亭同問柳綺裘紗帽金船酒長安宮闕九天邊  
肯為江籬回首否

粹老使君前被召約往它山謁善政侯祠既不  
果以書見抵謂可歎惜并示廣德湖新記因

成長句奉寄

長江衮衮西南流秋水時至狂不收大浪似屋山欲浮  
王侯神智禹所啖萬鬼琢玉它山幽梅梁鼉鼉卧龍蚪  
咄嗟湍駭就斂摯巨靈縮手愚公差障成十里沙中洲  
支分股引聽所求赤旱稽浸民不憂那得蟲蝗隨督郵  
汙邪甌窶滿車篝斯民飽煖何以醕廟貌突兀寒溪頭  
歲歲雞黍祠春秋老農擊鼓稚子謳當時人物紛鴈鷗  
豈無鼎食腰金儔朽骨往往空蒿丘姓名幾復人間留

唯侯施惠膏如油江聲浩浩風颼颼千古不見使人愁  
拔俗萬丈山標嶠使君不減裴商州下車百蠹隨鋤耨  
一笑四境無瘡疣天閑老步須驂騑已聞歸作金華遊  
欽賢訪古意未休畫船載酒岸鳴騶約我與往置脯餽  
冠蓋紛紛暇莫偷搔首悵望情綢繆我問使君亦何尤  
西湖萬頃蛟龍湫幾年荒蕪今則脩鑿鼓弗勝財不培  
長堤岌岌高岑樓寫有漚兮蕩有溝餘波北注引漕舟  
桑麻被野禾連疇鶴鶴白鳥雜游鯈蓴菱芡厭採搜

柳楊成幄蔭道周耕漁呼歌羸病瘳使君之賜侯可侔  
天邊旌旆看悠悠父老雪涕爭攀輶地僻借恂恨無由  
高文擣秀春華抽豐碑萃律鏡銀鈎千年空此留海陬  
君知此日思君不還如今日人思侯

登育王明月堂

引月貯虛堂堂高附南極我當盛暑來萬象生秋色堂  
豈朝朝新月亦有時食一寸坐禪心萬古磨不得

同舍弟泛舟西湖登畫錦堂步至紫翠亭望懶



堂景物懷故龍圖舒先生

王庭秀

城中十頃湖雲水相演漾春風破冰谷拍岸新流漲平  
鋪鴨頭綠澹沲蒲萄釀朱甍媚孤嶼梵宇麗相向萬瓦  
生清暉千花聯錦帳晨曦照炯炯芳氣浮泱泱日暮姿  
態妍煙霞渺空曠誰將水仙境聊借詩人仗卧護五年  
城追懷老詩將微吟示清野鏖戰得閒放變化無端倪  
虛無落名狀坐令湖上景勝絕神宇王當時經行地藻  
麗隨屨杖斯人今則亡物色亦摧喪他年牛馬走曾拜

丈人行塵埃久飄泊歲月成漫浪問訊懶堂君松竹忻  
無恙尚意壁間聲時賡朱絲唱撫事重興嗟陳迹徒悵  
望哦公十洲詩風月為悽愴

遊香山佛跡

周鏐

靈山名達蓬香水靄蒼龍祇久覆護雲物翳深谷拂  
衣何劫中神斧斷蒼玉至哉天人尊靈跡印金粟頗聞  
開士識飛錫隱巖麓坐令湖海間香供走川陸巍巍處  
報地色相儼金屋緬想舊中瓶猶能慰心目籃輿訪蓮

社一笑欣白足撫事動幽尋疇能念榮辱松爐裊知見  
餘力付碁局更覺夢中身脩然百無欲

書隱潭郊脩輔

在昔知何人鑿破青山骨飛泉直下來千尺瀉絛忽兩  
壁蒼翠開一陣風雷突旁無塵埃蹤中有蛟龍窟寒氣  
不可嚮猛勢豈能屈安得當早年為霖濟羣物

題東寺松石小軒呈同遊關彥長明府

盛次仲

一松偃蹇蒼龍盤一石嶄巖怒虎踞漫來題作龍虎軒

便恐風雲卷將去

送賀監歸四明應制 李白

久辭榮祿遂初衣曾向長生說息機  
真訣自從茅氏得恩波寧阻洞庭歸  
瑤臺含霧星辰滿仙嶠浮空島嶼微  
借問欲棲珠樹鶴何年却向帝城飛

衆樂亭

并序

錢公輔

衆樂亭居南湖之中南湖又居城之中望之  
真方丈瀛洲焉以其近而易至四時勝賞得

以與民共之民之游者環觀無窮而終日不厭孟子曰獨樂與衆樂孰樂不若與衆衆樂之名於是乎書既又為詩以記真景之萬一

云

誰把江湖付此翁江湖更在廣城中  
葦成世界三千景  
占得鵬天九萬風  
宴豆四時諠  
畫鼓游人兩岸跨  
長虹  
他年若數東南勝  
須作蓬丘第一宮

勢壓平湖四面佳  
好風明月是生涯  
鯨鯢背上浮三島

菡萏香中放兩衙屏列已疑雲母淨簾垂不待水精奢  
此心會笑元丞相終日樓臺為一家

同前 司馬光

橫橋通廢島華宇出荒榛風月逢知己湖山得主人使  
君如獨樂衆庶必深嚙何以知家給笙歌滿水濱

同前 邵必

梅邊民物鮮歡娛太守經營與衆俱園圃新陰多杞柳  
池塘生意足魚蒲長空不礙高飛鵠淺水兼容短脰鳧

此樂有誰知我趣歸來紅旆日西晡

城外千帆海舶風城中居市苦憧憧幾生佳景為民老  
一日賢侯與我同道上槐陰連帶翠水邊人面照花紅  
寄言樂有時還盡徒見甘棠憶召公

同前 吳中復

賢侯新葺水雲鄉  
壺閣崢嶸綠渺茫  
波面長橋步明月  
人家疎影帶殘陽  
風中白鳥侵烟去  
雨後紅蕖擁袖香  
從此郡圖添故事  
歲時遺愛似甘棠

烟波空闊岸低回  
草綠花紅處處堆  
一片湖光分島瀝  
四邊山色入樓臺  
從來未有吾民樂  
此地欣逢刺史來  
目斷鄞江何日到  
京師只得畫圖開

同前 陳汝義

聞說湖亭又一新  
不徒行樂樂斯民  
水光剩占鷗鷖地  
人意常同桃李春  
試展畫圖清俗眼  
况專閒席傲天真  
使君已陟螭頭貴  
應為烟雲入夢頻

遙思湖上自由春  
醉踏吟看屬使君  
水底天光開靜鑑



岸頭花氣遞紅雲  
島浮虛檻橋橋接  
風翼時鐘寺寺聞  
漬墨新名人會否  
不將民樂廢民勤

同前 張伯玉

句章太守錢君倚  
湖上新為衆樂亭  
花木豈徒游子愛  
笙歌長與郡人聽  
坐來高韻天風起  
飲罷餘香夕雨零  
安得凭欄縱吟筆  
玉觴遙對數峯青

同前 陳舜俞

湖光野色著人衣  
衆樂開亭此處宜  
擊擢浩歌山自響

踏青紅影岸相隨消除矰繳容鷗鳥改換風煙入柳絲  
荇菜藕花應見憶短蓬孤榜獨來時

同前章望之

是水為佳境中城浸碧湖樓臺萬室近物象幾州無太  
守恩千里新亭望一都地勞吾卜築景與衆游娛宇色  
低欄外波光上屋隅鴛鴦宜綉幙翡翠失深蘆九夏荷  
開簟三秋芰洗盂山林何處異江海此情孤夜氣寒蟾  
媚晴暉落日殊畫橋斜映柳細草亂縈蒲漁棹開浮藻

風簾散戲鳬野僧留曠蕩行子過踟躕逸興攀銀漢明  
眸湛玉壺圖經終煥越歌詠已流吳壯觀嘉時叙招來  
好酒徒樂僮優好伎唱女樂名姝閉戶誰能事宜人正  
丈夫樂邦方美俗鼓舞荷唐虞

同前 胡宗愈

平湖拍岸海潮通亭在平湖杳靄中花艷含春雲島晚  
波光照夜玉壺空動搖人影兩橋月洗滌塵襟四面風  
野老半酣亭下笑漁樵今日與人同

平蕪十頃綠含烟勝事興衰已百年島榭漫隨民意樂  
溪山應喜主人賢點粧野趣灘鷺髣髴妖容水上蓮  
日日流風轉謠俗棹歌長在釣魚船

三江亭

潘良貴

假守衰頽病日侵湖山雖好倦追尋登城忽覩三江水  
快我平生萬里心聊築小亭怡父老敢承佳句粲珠金  
春濤正待諸君賞更拂詩碑看醉吟

和  
蔣璿

安仁不放二毛侵，爽氣凌虛玉萬尋。  
談笑薄施三昧手，登臨誰會五湖心。  
倦遊方戢冲天翼，高賦難賡擲地金。  
怪得朝雲飛畫棟，夜來曾聽老龍吟。

和顧文

詞源倒峽勢奔侵，綆短那容汲萬尋。  
望屬滄浪驚鶴唳，志存流水識琴心。  
揮毫句句囊盛錦，拜賜人人袖有金。  
不日都俞在廊廟，更聽虎嘯應龍吟。

和王珩

潘郎未覺鬢霜侵佳致乘閒得得尋古岸渺茫分遠渡  
飛甍虛敞快人心融樽想見頻頽玉季諾由來雅勝金  
野老固慙東閣客何妨同作醉翁吟

和汪思溫

危亭聳觀與雲侵勝槩何勞杖屨尋回合江山真有意  
去來鷗鷺本無心歡聲洋溢均千里好句清新抵萬金  
四海倚需經濟手宣容長對白頭吟

和薛朋龜

爽氣寒光四壁侵青山千仞水千尋遠觀吾里瀛洲路  
悵望誰人魏闕心春到已多鳴珮玉酒酣應有解貂金  
紫微太守經營巧消得時賢次第吟

和王伯庠

使君不受二毛侵杖屨逍遙得勝尋撥遣簿書聊永日  
登臨山水一何心殘梅墜雪垂垂白弱柳搖風淡淡金  
倚闕大江供一笑幾多襦袴在謳吟

和鄭若谷

望遠登高萬象侵  
元戎端不為花尋  
未誇駕鶴蓬山路  
應壯斬鯨遼海心  
小艇鱸肥盤鱠玉  
危欄客醉椀揮金  
中流擊楫雄圖遠  
回笑三閭澤畔吟

和 陳晉錫

神襟百慮不容侵  
勝槩乘閒偶訪尋  
趺坐豈無觀水術  
臨流應有濟川心  
斂將蓬島溶溶氣  
散作陽春字字金  
郢曲調高人寡  
和微生何敢綴雄吟

和 陳栖筠



紅塵一點不相侵  
下瞰澄江幾萬尋  
地接海潮分鼎足  
簷飛鳳翼峙天心  
三山有路雲收幕  
午夜無風月湧金  
欲識龔黃報新政  
滿城爭唱使君吟

次韻明州戶部游蔣園

王亘

採蓮橋下路  
皂蓋拂雲來  
塵壓隨軒雨  
風生避暑臺  
酒緣佳客盡  
花為使君開  
憂患西溪舊  
常陪樽俎  
相忘此日杯

又次韻登靈橋門晚望

恩波和氣兩溶溶萬戶樓臺紫翠中渡水虹霓輕縹緲  
隔河牛女淡朦朧真仙路指三山近粒食人歌四輔豐  
旌旆欲歸歸未得滿船風月載漁翁

謝太守劉吏部示西湖圖用豐侍郎韻

四明太守愛西湖想像桃源舊日圖不放塵埃生水面  
為傳風月到皇都花開別嶼千機錦稻熟隣田萬斛珠  
聞說兒童騎竹馬至今昂首望通衢

和郡守彭吏部按視湖亭凡二首

周鏐

使君風味壓荊州每為吾民樂更憂錦里篇章推唱首  
浣溪光景促遨頭行春預約花欹帽把酒方欣雪點裘  
嶽史年來慙吏隱板輿時得從公遊

又

雙虹倒影上簷楹碧水澄空一鏡明野草閒花無限趣  
短檠幽榜不勝情已知風月隨人意聊為湖山載酒行  
却許錦囊賡夢草坐令詩興繞寰瀛

西湖三首 周鏐

曉鏡初開淑景明使君風味一般清舟從菡萏林中過  
人在鯨鯢背上行妙舞屢翻紅藥燕清詞時囀紫薇鶯  
賡歌久矣虛前席肯向樽前戀麴生

又

使君脩禊與民遊千里笙歌水面浮動地雄風雲外起  
截天雌霓雨中收登臺已有難并樂擊壤寧無寡和憂  
却憶內家新賜火海棠無數出牆頭

又

牛鞭初動轉新鷺夢覺池塘選勝行水鏡光中千騎合  
山屏影裏萬艘橫雲從布穀原頭過雨向催詩筆下生  
藻繪昇平知有待閭梅先已賦調羹

西谷

由桃源徑以西至應  
真絕頂共為西谷

林旦

平昔山林性今來水石鄉栽花尋秀壠泛酒掬滄浪地  
暖春長早雲陰夏自涼歲成還北去魂夢此難忘

蓬萊泉

即煉丹山  
透瓶泉

採藥瀛州去扁舟竟不還黃金成海外故井獨人間乳

滴岩花潤苔封石字斑空令千載後猶復望三山

觀瀾亭

萬古淵源會憑欄試一觀雲濤誰可際勺水自為難日  
月閒中永乾坤物外寬幽人休悵望平地亦波瀾

射圃

百步開新圃彎弧注采正樽壘供樂事金鼓疊懽聲敏  
手徒為妙中心自要平何人能舉解觀堵定縱橫

送明州王大卿

王安石

大厯才臣有此州  
鵬雲今駕鹿轡游  
從來所至邦人喜  
真復能分聖主憂  
千里封疆何足治  
一時名跡故應留  
屬城舊吏雖疲懶  
尚可揮毫敵李舟

寄育王大覺禪師

單已安那示入禪  
草堂難望故依然  
山今歲暮終岑寂  
人更天寒最靜便  
隱蹟亦知甘自足  
憑心豈吝慰相憐  
所聞不到荆門耳  
人老禾新又一年

弔王致先生

處士生涯水一瓢行年七十尚蕭條老妻稻下收遺秉  
稚子松間拾墮樵雖有聲名高後世且無饘粥永今朝  
窮魂散漫知何處甬水東西不可招

和馬粹老四明雜詩聊紀里俗耳十首

舒亶

百粵喧譁外三江指顧中耕桑遺俗在草木故城空

鄮即

鄮也

近澤知田美

俗重近澤田

多魚驗海豐由來形勢地越絕

控遼東

澄水鋪千練平山伏萬犀月橋蓮棹小春圃酒旗低蓬



島雲長在

邑有蓬萊鄉古史云金銀為宮闕望之如雲

桃源客不迷風流未

寂寞遊屐半香泥

御史平囚日

二囚詩在郡樓下

郎中渡母年

今謂渡母橋

豐碑推筆

妙

二碑皆名書

孤冢枕城偏

汝南孝子墓在焉

白鶴空寥泐黃蒿尚

蔓延九原如可作執馭故忻然

箔蠶迎豆熟

俗有蠶豆

江雪伴梅消抵虎螯經夏

里語八月蟪蛄可抵

虎

跳沙蛤趁潮

里語有跳沙蛤

酒甕雙印貴

俗重雙魚酒

藥肆萬金

饒

謂馮樓也

未覺西風遠三溪好採樵

慈溪小溪籃溪也

巷陌隨橋曲，閭閻占水窮。郡樓孤嶺對，古謂鎮市港兩

潮通

開在城東隅

春暖雞鳴嶼

在慈溪

秋寒鴨信風

江湖所呼

家家

人富足，擊壤與吾同。

歲熟禾論秉

俗以二束為一秉

人歸夜擊鐘，金澄沙底水龍卧。

井邊峯

金沙龍井皆在育王山

香火常存社

俗結金光明金剛社

漁鹽每奪

農年來，縑帛賤砧杵，萬家春。

稻飯雪翻白，魚羹金鬪黃。鮎埼千蚌熟

在奉化

花嶼一村

香

在慈溪

海近春蒸濕，湖靈夜放光

廣德湖每現光采

北窓休寄

傲大隱即吾鄉

大隱山乃楊適先生所居

禽孝傳居俗

禽孝鄉在奉化

風癡動決旬靈鰻旱天雨

即龍井也聖

米歉年尊

凶年尊根為聖米

江漲長如海冬溫恰似春雞豚追

伏臘行路亦情親

佛磬雲中寺樵歌郭裏湖城居蔭楊柳野寇息萑蒲

語傳盃琰漁蓑入畫圖幽香滿花谷不趁雪霜枯

蓮閣紅堪掣蘭池靜不流

池在府前

梯航紛絕徼冠蓋錯中

州

高麗比貢入多使者

草市朝朝合

四郭皆有市

沙城歲歲脩

邦人為郡城雜

以沙故  
易類

雨前茶更好半屬賈船收

題福源院

地占靈龜背山橫小嶼頭一橋雲借路雙沼月分秋竹  
影搖虛室松烟著曉樓殘鐘誰共聽空籟更颼颼

題尊教院

竹砌緣寒渚松蹊藉綠苔樓臺隔林見花木帶雲開溪  
旱常流水峯青自隱雷月華幾萬頃誰掉酒船來

香山野步二首

龍護空堂鉢雲籠古殿燈經窓僧待月茶井客敲冰驚

鴈回峯影疎星亞塔層心清更無睡未羨杜郎能

老杜宿贊

公房有燈影  
照無睡之句

空澗寒探月高齋客聚星霜分破窓白山獻隔簾青窺  
水知僧定占雲識地靈時時驚鶴夢木葉下危亭

和遊棲真寺見寄

曾是談經一草堂千年金碧欲飛颺頂峯有路青天近  
絕壑無塵赤日涼月底露驚猿鶴夢雲中風動薜蘿香

芝萋茶竈平生念遙謝仙人白羽觴

和西湖即席二首

金碧樓臺閣暮烟彩虹雙影卧漪漣雲鋪物外無塵地  
月滿人間不夜天細柳千門維畫舸華燈兩岸度鳴絃  
清狂亦有黃冠客不負仙人載酒船

十洲風籟韻笙簫疑有仙人燕碧桃影逼銀河星半墮  
氣吞月窟免爭豪九秋波浪沙鷗狎萬古聲名釣艇高  
却恨何須明似鏡空令志士泣霜毛

雨中遊仗錫

何人仗錫過千峯  
雨裏風烟轉不窮  
暗壑水聲清決決  
深巖花氣濕濛濛  
遙知雪嶺開亭近  
舊說雲鄉有路通  
自恨青鞋踏城郭  
仙遊長在夢魂中

遊雲湖過香山偶成二首

去路騫騰逼紫霄  
何年鳬舄墮王喬  
暗峯藏雨皆龍窟  
靈草含霜半藥苗  
已覺山衣雲撲撲  
還疑風鬢雪瀟瀟  
捫蘿更上苔堯頂  
下視滄溟百水潮

塵境回頭隔聖凡參差疊嶂巧如鏡歸雲墮碧粘僧屐  
落葉飄紅上客衫果熟遙看猿渡澗風號定想虎離岩  
長天自有無窮景未信西岡日半銜

和劉誼翁留題惠安二首

塢雲過雨翠成堆天淡平湖一鑑開萬木號風韻絲竹  
千峯帶月上池臺靜無俗駕金鋪地閒有高人玉滿盃  
聞道碧桃看欲發劉郎何事不歸來

十里松行翠挿天暗溪嫩草尚芊綿笙歌自滿蕭郎宅



琴鶴空隨賀老船，未分舊遊雲寂寞。遙知歸夢蝶聯翩，故山幸好宜回首。還見人間換一年。

和新開西湖十洲之什

洗出烟華紫翠勻，再將絕景付重闌。千山有影螺垂地，一水無塵鏡照人。香濺釣筒萍雨夜，綠搖花塢柳風春。杖藜盡日滄浪興，時有幽人岸白綸。

秋燕十洲閣

綠玉手持尋五嶽，正應未識海邊洲。倚欄花木參差見，

對岸笙歌次第遊烟霽多疑九峯曉波平全勝六鼇浮  
仙風坐隔紅塵路消得丹青詫此州

和樓試可遊育王

參天松栢綠陰陰古佛巖前一路深猿鳥不驚如有舊  
雲山相對自無心數泓寒水雲藏雨十里輕沙地布金  
杖屨更知非世境上方日日海潮音

題鄞江

地吞越絕海分深渺渺平流萬馬駸早晚渡江潮有信

往來鷗鳥客無心  
寒空倒影千山動  
暖日澄波萬籟沉  
安用魚龍閒養鬣  
平時春雨自成霖

題西山雙乳泉

石眼雙開白欲漫  
潺湲更傍碧琅玕  
地饒爽氣全無滓  
天借靈源兩不乾  
曉月自分雲外潤  
午茶誰鬪雪中寒  
孝先多睡相如渴  
始把清甘乞取看

題靈鰻廟三首

繞塔想曾隨白馬

老父云此龍為護塔神

蟠泥故復傍金沙  
旱天

霹靂長平地樂歲汚邪每滿車受賜由來千里境論封  
消得萬人家朱門便是金塗榜未負風雲在一涯

絕境朱丹新棟宇深山靈響雜蜿蜒黃金地底應千歲

古記云金  
千歲有龍

甘雨人間幾萬家西域不勞方士呪

西域方  
士能呪

者臨川禹步吹氣龍  
即浮出見抱朴子

南州重識使君車

後漢百里嵩為  
隨州刺史行部

雨輒  
隨車

老農爭賽豐年社古木蕭蕭自曉鴉

亘古人間蒙潤澤數泓雲底貯清泠功將名並山無泐  
道與人尊地轉靈曉殿千家供香火旱天萬里入風霆

誰知別有醍醐味  
行路憧憧半未醒

題香山湯禪師

千古神僧舊石局  
清風如在地還靈  
溪形偃月無窮碧  
山氣當雲不改青  
葉熟猿猱時嘯聚  
錫飛岩穴尚芳馨  
西來祖意誰人問  
老栢森森翠滿庭

題蒙堂

由來去住不相關  
贏得隨緣到處閒  
笑出海雲飛一錫  
行分江月過千山  
微言定許誰人叩  
勝事偏於俗士慳

咫尺蒙堂隔霄壤城東搔首只空還

題翠巖丈室

別移寶所出埃塵無限金光欲照人  
斤斧不驚龍象伏棟梁特地水雲新  
千峯坐斷人間路一榻分來月裏身  
更看須彌師子座未饒摩詰妙通神

題明月堂

郢匠猶來巧運斤清光那復隔纖塵  
九秋萬里雲頭路半夜千峯頂上人  
坐見乾坤入肝膽陡驚草木亦精神

應憐赤水尋珠客  
白日茫茫尚問津

題五峯兼簡英禪師

何人縮地海東偏  
靈嶽分來不計年  
幾見彩雲爭照日  
真疑仙掌欲擎天  
依稀故國松千尺  
迤邐前山石一拳  
四面開軒看不足  
老僧時立碧溪前

題天童

日日青鞋踏白沙  
未應泛艇即靈槎  
雨溪清越鳴哀玉  
風蔓蜿蜒動暗蛇  
曉潤芝萑挑秀茁  
午香茶竈煮蒼芽

玲瓏仙客知何在千古烟霞自一家

題布袋和尚

休話人間我獨尊何妨屢肆且隨羣  
乞錢往往多空手問路時時向白雲  
壁上形容圖尚在囊中氣味許誰分  
分明提起無人問欲會應須眼裏聞

題靈橋門

危樓清迥立江風紫邏紅旗落日中  
暑雨澗溪來浩蕩暮烟洲渚隔朦朧  
歡聲不厭重城近霽色遙知秀野豐



滄海一時傳麗句天才真是杜陵翁

蘇文饒往昌國意頗憚之送以詩因勉之

陳瓘

已聞舟楫具那得苦留君  
雨過霜風急帆飛雪浪分  
長途方策足暇日正論文  
功業他年事風波豈足云

送周初年

蘼鹽雖不飽心與古人期  
口體非吾養紛華任爾為  
經明逢地芥穎脫看囊錐  
兩驥皆宛種天衢好並馳

次韻袁朝請陪太守遊湖心寺

塵鏡紛紛俗累增故尋幽境訪南能  
湖波浩渺無窮淥  
寺屋高低不計層  
詩老新吟工惱客  
使君餘暇得陪僧  
棋中得失何時了  
一局輸贏未可憑

予同彥老自四明之永嘉中道留宿嶽林會法  
照海印二禪伯夜話投曉登車乃行留題于

寺  
盧天驥


病骨倦鞍馬禪居欣少留  
暮雲山盡路孤磬月明樓  
林靜鉤輶曉風香罷亞  
秋重來坐磐石相對話歸休

歎息老禪伯蕭閒心自如買松栽別塢引水過新渠草  
色經行外禽聲晏坐餘自慚雙客鬢垂老尚征車  
報國竟無補敢辭山路遙晚寒生竹徑新漲斷溪橋奔  
走真逋客安閒媿老樵令人欲心折風雨夜瀟瀟

途中書懷寄奉化知縣

自帶淵明漉酒巾食鮭甘作庾郎貧雖無殘菊簪華髮  
賴有青山似故人幾處鴉鳴牛背肉經年衣犯馬蹄塵  
待携神武朝衫去還我烟溪漱石身

犇馳漸覺歲崢嶸負郭蕪田未退耕正恐山溪吹岸去  
任從烟草喚愁生別來竹院門長掩好去魚舟手自撐  
漸晚歸心在何許夕陽低處伴雲橫



延祐四明志卷二十